

Des zcu orkünde haben wir vnser insigel mit vnserm willen vnd wissen an disen offen brief lassen drucken, der gebin ist zcu Prage in vnserm hofe nach Christs gebürte dreyczenhundert iar dar nach in dem drey vnd achtzigesten iare an dem dünrstage nach sente Petirs vnd sente Pauls tage.

Nach dem Orig. im Rathsarchiv zu Pirna mit dem innen aufgedrückten Siegel Thimo's von Colditz.

No. 52. 1384. 3. Febr.

Anna Frau zu Colditz und Sigmund ihr Sohn eignen dem Allerheiligenaltar in der Stadtkirche ein von dem Altaristen Johannes Melnik erkaufte und überwiesenes Häuschen.

Wir Anna vrowe zcu Coldicz vnd Sygemund ir son bekennen —, daz für vns komen ist der erber wyse prister her Johannes Melnyg altariste zcu Pirne vnd hat vns vorgelegt, wy daz er eyn husechin vor czeiten gekawfft habe zcu seinem altare, daz do gelegen ist by dem Bergbrünne an der ecke vnd vor iaren der vrowen Vickynnen von Donyng gewest ist, daz ouch von dem pfarrer zcu Pyrne vnd zcu-kumfftigen pfarrern do selbest zcu Pyrne zcu lehen rürt vnd geht vnd dem selben pfarrer vnd seinen nachkomen pfarrern zcu Pyrne alle iar ierlichen czinset vnd zcinsen sal czwene bemische grossen vf sente Michelstag, vnd der selbe her Johannes hat vns mit guten willen demütlichen gebeten, daz wir daz selbe husechin zcu seime altar, der do genant ist Aller heiligen altar vnd gelegen ist zcu Vnser lieben vrowen in der pfarrekirche, den er iczunt belyset, gnediclichen gerüchten zcu wydemen vnd zcu bestetigen. Des haben wir an gesehen seine redeliche bete vnd haben mit wolbedachtem müte vnd auch mit des pfarrers willen vnd worte daz selbe egenante husechin bestetigt vnd geeygent, bestetigen vnd eygen zcu dem egenanten Aller heiligen altar mit krafft diez briefes, also daz der egenante her Johannes vnd seine nachkomen altaristen, die den selben altar haben vnd belesen werden, daz husechin habin vnd dorynne wonen sullen mit rügen vnd resten vnd vor aller mennechlich vngehindert, doch also daz der pfarrer vnd seine nachkomen pfarrer zcu Pyrne die lehen vnd zcinse auf dem selben hüse ye behalden vnd haben sullen —. Des zcu eyner merern sicherheit haben wir egenante Anna vrowe zcu Coldicz vnd Sygemund ir son vnser insigele zcu vrkunde an dysen offen brief mit willen vnd wissen gehalten, der geben ist nach Cristi geburte dreyczenhundert iar dar nach in dem vierden vnd achezigsten iare an sente Blasii tage des heiligen merterers. *

Nach dem Orig. im Rathsarchiv zu Pirna. Die beiden Siegel sind abhanden gekommen.